

江

西

詩

徵

江西詩徵卷四十四

南城曾煥賓谷編輯

明

練偉

信原名高字伯上新淦人元季領鄉薦隱居不仕
工詩洪武初召爲起居注以直言忤旨出爲廣德
州同知歷臨汀鎮安二府通判

送雲南教授劉後耕

見說思陵過五溪
熱雲蒸草瘴天低
星聯南極窮朱鳥
山抱中流界碧蘿
首猶照盤官况冷
芭蕉夾道驛程迷
巍巍
堯德元無外未必
文風阻遠黎

江西詩徵

卷四十四

明六

送趙將軍

嵯峒一劍倚秋陰誰識將軍百戰心老去功名餘百髮開
來歌舞散黃金呼鷹大澤風竿勁射虎南山雪羽深敲缺
唾壺銀燭短時人不解隴頭吟

送張起潛之柳州

潯水環城擁翠來柳陰府署倚雲開唐祠侑食歌丹荔漢
杜銘功篆綠苔日落雷塘龍霧合虹消桂嶺颶風回南行
無雁音書少別思絲絲不易裁

吳觀

觀南昌人明初官工部郎中工詩

望湖亭

湖上瀟瀟雨正收。天涯風物此亭幽。簷垂夕照連平野。帆
掛西風下急流。樹色紅含。遷客醉。雁聲清。落大江。秋闌山
南北。俱戎馬。擬向煙波泛釣舟。

杜環

環字叔循。廬陵人。隨父一元遊宦金陵。遂家焉。明
初爲晉王府錄事。

題畫

每愛江山趣。停杯看畫頻。千峰青不斷。萬里碧無垠。雲樹
參差晚。鷗波浩蕩春。扁舟何處客。飄泊正愁人。

蕭執

執字子所。廬陵人。洪武三年鄉薦。授國子學錄。親

老乞歸領邑教學者宗之

劉子高贈王明善依韻以和

匡廬之山瀑布泉老子結社來何年
林間經罷常隨鹿雲外樵歸或遇仙
坐石有時巾挂樹焚香終日袖携烟
市南別有秋江水種得花開總是蓮

漱釣軒爲姚宰作

綠竇陰陰翳牕戶此是姚侯讀書處
搖空翡翠晚宜人食實鸞鳳曉相語
稚子牽衣惜春露候卒編籬護秋雨
何當便乘人間事抱琴走覓湖山住

次答劉汝弼見寄之作時汝弼客德慶侯第

春事今餘幾花枝已不多
向人愁作客思爾積成病
感鳳

翔高漢慈烏戀舊窠平津東閣好早晚定相過

西昌驛

龍門道場西昌驛萬室鱗鱗照晴碧驛前野草如人長不
聞馬嘶空斷腸十年喪亂遍南紀月窟權奇淪萬里祇今
官府重興臺誰復置郵能致此古道迢迢春復秋北有螺
浦南灘頭城郭雖非路長在過者倉卒難淹留驛山碧鳥
半無主鴟鵂作巢滿松樹行人莫指杏花春酒樓蕭條空
掩門黃塵滾滾風浩浩請君暫閱西昌道

雲峯寺次劉子高韻

初陽陟層巘松徑劃然開涼飈動嘉樹飛瀑吼晴雷避俗
僧初定看山客正來兒童披短褐顛倒掃莓苔

武山

武山奇勝在東南公子尋芳樂且耽
攜酒不勞泉作釀捕花旋用竹爲籃
雲中奏樂天風動石上題詩夜月酣
況有風流前輩在便移星斗照清談

武山義塾文會學文旣別用黃禮韻送之

白竹巖東武姥西茅堂結構與雲齊
當春化雨沾民物昨夜文星耀壁奎
豈有詞章爲世好敢將名姓待君題
諸生不盡琴箴意楊柳河橋望欲迷

徐泰和禱雨有應時請龍於武山三顧二潭

泉阿出匣斬羣妖雨勢隨龍旱勢銷
魚尾化時歸佛鉢馬蹄停處倒山瓢
丹心夜走三天檄赤地春回六月潮
從此

京師蒙福早未應百里駐侯軻

武姆岡

高霄分處遠自下望中尊
仙姥何年化清秋聞嘯猿

陶皮石室

霖雨回焦土神遊隔翠壑
至今崖石底空洞自然春

虎鼻峰

蒼天生玉筍絕地起屏山
窈窕紅雲裏官曹肅筵班

真珠泉

識得蒼龍噴翻疑合浦還
地靈不愛寶特獻普陀山

丹井

九轉丹成采雙龍井出雲
向來龜出曝還載洛書文

仙巖雲氣

峩峩千丈巖雲氣有無間神仙何必問自有濟人丹

鵝峰晴嵐

鵝鼻亦何高屹立江之南幾時躋絕頂拂袖捲晴嵐

胡子祺

子祺名壽昌以字行吉水人銓十世孫廣父洪武三年選文學士授監察御史遷廣西按察司僉事屢平冤獄毀淫祀改知彭州修復都江諸堰歷延平知府卒於官

題龍川園

是文系川所居地名

溪能已度禹門高萬里頽瀾漲雪濤勝地不知今大畫滿

林煙霧起蕭騷

周 渠

渠字仲方吉水人洪武三年鄉舉官台州同知諭
成廬陵以士人李昌祺請起爲廬陵訓導後佐夏
原吉以經義治河蘇松吳人稱之

吊席心齋鍊師和少師姚公韻

冠裳已葬海虞峰竹下茶甌不復同華表人歸身是鶴葛
陂仙去杖成龍七星檜老瑤壇靜午夜猿悲蕙帳空徒遣
友朋懷遠致驛亭惆悵立西風

王均章畫虞山圖

中陽山人思超逸圖寫江山用金碧滄海紅塵幾度飛特

向人間畱妙蹟層巒萬疊烟霧浮禪宮道院當山頭浮屠
屹立遙漢外危石正瞰清溪流平橋渡水西林去草屋茆
亭隔烟樹童子攜筇獨鶴隨仙人背立溪橋路前山藹藹
知幾重懸崖怒瀑飛晴虹漁舟影沒汀樹遠牧笛聲斷江
天空中陽妙手誰復擬咫尺依稀如萬里仙巖有路疑可
到便欲振衣凌拂水君不見吳山吳水南海壖隨閣老人
畱七年紅橋畫舫姑蘇市晚稻香稔湖上田江山千里總
奇絕我昔思歸情惘然還君此畫一長嘆花外聲聲啼杜
鵑

王佑

佑字子啟泰和人沂弟洪武三年舉教官擢監察

御史出爲廣西按察僉事改知崇慶州招徠撫卹
得士民心坐事免官卒有長江萬里橐

次梧州

蒼梧平遠水如苔日出官船蕩漿開五筦江從南海去九
疑山跨道州來乘槎蟹戶緣流住輸粟徭民出峒回聖代
分巡方遣使咨詢敢憚徧蒿萊

荆南舟中寄華容孫景賢

故人不見十年餘聞說華容早卜居湖上屢停千里懼嶺
南不寄一行書別來每恨知心少老去翻令會面疏題句
荆南煩去客早春問信向茅廬

謁狄清廟

江西詩徵

卷四十四

明六

六

夜入崑崙破敵關長驅駐節望仙山
兵威已振遐荒肅寇首寧容大理還
春雨蘋蘩遺廟在夕陽林木戰營間
將軍千古平蠻績馬援真成伯仲間

夜泊采石懷李白酌酒邀月共酌

清夜宿采石浩歌懷謫仙海風吹明月
飛上青天懸月光宛如昨太白久不作
呼酒坐船頭邀月共斟酌大江如平天
倒看明鏡圓水上皆白雪流光入余船
當時豈真醉捉月猶兒戲千載笑疎狂
幾人會高致我今問嫦娥百歲愁常多
古月至今好今人如古何

題蕭彥翀雲構

青霄萬餘仞白雲千百重不在太行九折坂
不在匡廬五

老峯海東高人蕭彥翀紫萼如戟顏如童卜居不肯向巖
谷乃欲結構雲之中雲下來兮栖素欄秀色可攬光纖纖
曉晴潤氣拂蕙帳暮冷清陰飛竹簾風臺之素娥爲吹紫
簫曲曲罷青天高澄澄如碧玉露洗三更寒煙飛一庭綠
君家世躡青雲梯方匡鐵面秋霜飛繡衣正當霄漢立勁
翻凜凜凌虹霓予亦曾襟隘寰宇曾泛靈槎訪牛渚好登
雲路早從龍大濟蒼生作霖雨

題蕭雅言武山讀書處

武夷山容春更清員如仙髻方如屏中峯遙對章江水松
頂平臨大角星憶我山中尋武姥手招陶皮二仙侶泉陰
芝草春自香洞口琪花夜初吐武姥瑤壇凌紫霞骨青髓

綠顏如花謂言富貴等塵土授爾長生九轉砂龍吟虎嘯
綵鸞唱夜半鳥飛曲江上山中留得煉丹泉疑是銀河瀉
千丈我祖前朝胄監還愛蘭諸老同栖山武山福地金字
額至今照耀雲林間聞君讀書隱巖石笑我被徵去鄉邑
手種巖前幾箇松應有清陰坐沾席君今解組賦歸休我
復乘槎事遠遊想得雲峯峯下石待君高枕聽泉流涼風
吹月從西度玉盤挂在長松樹江南爲寄玉芙蓉倘得丹
成上天去

自城陵遣阮庚上桂林侯姪伯貞挈家入蜀

念爾何時見相離七月餘如何千里道不寄一行書老恐
妻孥隔貧憐骨肉疏錦城宜早到詞賦訪相如

雲安夜泊同子祺諸公分韻

今夜巴山雨蕭蕭江上聲短篷依岸宿遠水隔灘明已近
雲陽驛初辭夔峽城中途仍擬別去住若爲情

胡問

問字松友鄱陽人洪武四年舉秀才授都督府都
事遷經歷建文時選右補闕進大理少卿靖難師
入偕方正學同召命草詔不屈死姻族二百七十
人同遇害福王時贈刑部尙書諡忠烈

題畫松

幽人無俗懷寫此蒼龍骨九天風雨來飛騰作神物

吳伯宗

伯宗名佑以字行金溪人洪武四年廷試第一官
至武英殿大學士旋降檢討守正不阿曾上疏劾
胡惟庸有榮進集

南京應制

龍虎山河御氣通遙瞻帝闕五雲中英雄盡入江東箝將
帥多收薊北功禮樂日躋三代盛梯航歲貢萬方同都將
盛德熙文治殊俗全還太古風

長江潦水詩十二韻應制

巴蜀已消雪長江潦水渾淇濤涵日月巨浪浴乾坤迴擁
三山出雄驅萬馬奔大聲如拔木遠勢瀉傾盆洗蕩川原
混微茫島嶼踴漫漫連兩岸渺渺接千村殺轉盤渦急雲

蒸溼氣屯浮游多浴鷺變化有溟鵬已足沾疇隴還應赴
海門朝宗長不息灌溉意常存惠澤流今古陰陽順曉昏
滔滔南國紀永護九重尊

題秋江閒驛圖

大江瀉奔流浩蕩去不息青岑列兩岸倒影搖空碧樓高
野陰闊錦樹覆沙驛帆落天際雲人歸渡頭夕緬懷滄州
趣萬里見秋色長嘯倚西風因之豁胷臆

題畫

山碧水悠悠垂楊蔭小舟釣竿長在手涼影一天秋
茅屋深藏樹青山半入雲秋風何處發漁唱隔溪聞
結屋依林麓支橋就石磯青山微雨過一片白雲飛

奉使安南國聞角

海水盈盈漏轉籌霜風吹角到譙樓
夢殘明月三更曉心
愁聞雲萬里秋玉帛幾回賓上國
詩書半世客南州平生
夢業渾如昨無奈青燈照白頭

奉餞湘王之國

秋風江上錦帆開荆國人瞻帝子來
鴻鴈九霄分雨露魚
龍七澤避風雷丹砂不數淮南秘
祠賦寧誇子建才民壯
奠居藩輔重年年來進壽堯杯

橫秋風吹笛應制

庭樹西風灑氣清何人吹笛作秋聲
天連碧海蒼龍吼地
接丹山紫鳳鳴柳葉穿雲添逸興
梅花飛雪動幽情更深

坐久蟲聲切萬里關山月正明

題李氏棲碧樓

唐有謫仙人風骨特高妙
晚愛棲碧山閒心付登眺
桃花與流水目擊領其要
遐觀窮有象幽討入無竅
不知誰相問但覺遺一笑
聲落天地間松風紫鸞叫
諸孫企高躡異世頗同調
瑠樓睇空青銀榜生光耀
予亦愛其人臨風調長嘯

題環溪書堂

結屋臨溪曲藏修離垢氛
白沙含翠竹高樹入青雲
樂志依林麓精心究典墳
山光當戶見灘響隔牕聞
練帶晴江合嵐陰碧嶂分
松風秋瑟瑟竹月夜紛紛
光射囊槩案香

浮辟蠹芸凌雲晴雪映繼晷暮膏焚博物才難竝尋源志
不羣靈槎循漢渚寶劍耀星文盛世方崇士高才盡策勳
願言經濟畧光輔聖明君

周子諒

子諒名愷以字行廬陵人洪武四年進士與修禮
書授工部虞衡司主事有集

讀子書作

學館坐無事故書聊復翫披文旣蒼叢尋義亦泮渙趨前
後已逸顧舊新輒竄萬言雖畢陳一理竟未貫往往卷未
終心目已潰亂易書詩春秋辭簡義亦煥奈何百家書纍
纍鼻几案絲延比葛蕭根遠益纏絆雕剝出葩卉綴緝呈

組筭推以合身心宜若霄壤以吾欲盡其文掇取歸爐炭
往者予弗及來者予何憚作詩示朋曹無乃駭童卯

贈別郭元達

黃鵠乘天風飄飄忽高翔飛飛巢林鳥刷羽情內傷豈無
凌霄志六翮不得長念子平生意相送以傍徨勿言易爲
別明發各一方悲來解佩劍爲子復進觴且爲游子歌歌
詞何慨慷疾風吹征颿旭日在衣裳自古有離別各言慎
行藏

白紵詞

井梧墜葉聲如雨轆轤夜靜莎雞語西里佳人怨薄寒凋
悵燈前歌白紵白紵新時白若霜象床開合秋水光製成

只恐香塵汚衣著偏宜九夏涼西風乍入羅幃裏數點清
塵不禁洗競開篋笥試新紉舊服拋那復理嗟爾白紵
怨勿深憐新棄舊他人心願將貞白永相保今年卷卻明
年好

管貞

貞字源清寧鄉人洪武四年進士授山東陽穀縣
丞寇至被執置賊死

勸農

南山布谷聲北山布谷聲汝耕汝得食禽鳥何多情

殿 榭

榭字公執南城人洪武四年進士

瀑布泉

瀑布宜終宵，幽鳥時一吟。浩然太虛際，始識本來心。燒閱日自長，步遠意亦深。更攜九節杖，插徧蕭蕭林。

陰鐘

鐘字彥聞奉新人，洪武四年舉本縣訓導。

百丈猿聲

百丈天高風滿林，歲時頻聽野猿吟。紫蘿露濕鐘初靜，紅樹月明秋正深。清嘯謾添騷客淚，哀聲不動老禪心。玉環獻罷歸山去，渺渺碧雲何處尋。

凌吉

吉龍南人，洪武七年以文學科徵爲刑部郎中，持

法明允太祖有詔特嘉之

玉石巖

歷覽山川境龍中玉石奇雙巖風景異四壁畫圖垂日下
天疑近山空路轉歛虛懸千尺壁謝客好題詩

朱善

善字備萬號一齋豐城人九歲通經史能屬文元
末隱居著書洪武八年廷試第一授修撰歷文淵

閣大學士致仕卒諡文恪著有詩經解頤史略及

前後集

按靖錄所撰墓志名善繼此據列卿錄

遠別辭送餘十令李謙山

浙浙兮雲悠悠木葉落兮天宇秋君胡爲兮不返嗟久

客兮淹留攬西山兮秀色泛東湖兮一明月樂莫樂兮新
知心奚忍兮輕別山有虎兮湫有龍勞余思兮忡忡眇餘
干兮何許揮五絃兮送孤鴻父老兮扶藜兒童兮竹馬侯
之去兮我心悲候之來兮我憂寫桂櫂兮蘭舟搵子衿兮
夷猶南州雖好兮不可以久處嗟子去兮何以慰我之離
愁

望雲圖詩爲廣州大使熊悅作

瞻彼西山麓白雲何悠悠吾親舍其下望之懷百憂浮雲
不可卷逝水不可返遊子悲故鄉別親日已遠雲飛可逾
嶺母老難辭家豈無甘旨具奈此道路賒昨日鄉親來老
母幸無恙殷勤附書去慰母倚門望阿母望兒歸兒歸未

有期願母加餐飯慰子長相思

長短句

翁騎驢兒牽車童子荷擔相追隨風淅淅草淒淒阿兒苦
寒翁苦飢翁雖不語心傷悲吁嗟薄命當訴誰遼東雖云
樂不如早旋歸

甲戌過桃源驛

迥與武陵異偶然名字同祇知迎驛使豈識問漁翁脆質
慙蒲柳浮生愧梗蓬何由訪仙境不與世人通

辛卯趨稻田驛

涼風吹古道落月照空山雁過人開戶鷄鳴客度關愁多
心緒亂身老鬢毛斑欲就君平卜茲行幾日還

聞雁

汝向江南度江南我故鄉雖無書達意却有淚成行淺水
浮蘋藻良田足稻粱秋來鴈眼疾去去亦須防

二十九日戌戌別刑部從事仇文炳

累月陪歡笑君歸我獨行幾時重會面異國倍關情匹馬
回京遠扁舟過海輕故人來問訊憂喜轉相驚

王時保

時保樂安人洪武十一年薦舉歷刑部主事按治
浙江山東決疑獄甚衆以事謫戍雲南御史某疏
其清苦召還除本縣教諭卒有江淮芳草集

遊金精山

梅川之山拔平陸長松倒挂石欲落層巒秀出雲錦張中
有洞天三十六丹崖曲水相縈迴祥雲紫氣長徘徊石闌
洞扇當天開白日照耀升仙臺碧桃露暖半紅吐舉觴酌
仙仙不語會當同跨木鶴飛萬里扶搖上天去

蕭 翀

翀字鵬舉泰和人少孤好學得詩法於劉子高洪
武十四年以賢良應制賦詩稱旨授蘇州府同知
歷山東鹽運副使以子鏊貴贈太子太師

宿道德壇東白水道人

明月不可得孤燈還近人
祇緣懷久別轉覺坐相親
露下松壇夜雲歸石洞春
所忻心跡靜笑語見情真

八日訪友會亭馬上作

新平騎馬汴河堤，草暖沙晴信馬蹄。
路轉桑林時見兔，舖田茆店午聞雞。
尋芳漸喜春初及，訪舊先愁日欲低。
料得一彎今夜月，多情偏照會亭西。

挽迎仙觀熊得昌鍊師

把臂神仙竟不回，山中弟子有餘哀。
函關曉霧青牛去，華表秋風白鶴來。
九轉丹成遺井竈，三春花落閤亭臺。
時來弔古懷清隱，愁絕芝田半草萊。

寄林知縣彥澤

多時無便到東津，料想風光日日新。
柳畔鶯聲能醉客，庭前花氣欲薰人。
舊馴野鶴丹生頂，新買河魚錦作鱗。
解印

歸來宜晚釣笑談傾倒有西隣

夜泊安慶

水國勢漂搖江城景闕寥朝天知路近望月憶家遙雨散
虹光靜煙清蜃氣消明朝風色好穩駕海門潮

臨溪齋

高齋光霽愛臨溪兩岸垂楊翠色齊石上鳴琴看鶴睡溪
邊洗酸聽鶯啼閒來自愛心如水興至無嫌醉似泥爲訪
幽棲渺何許因風先與寄新題

奉呈子高劉先生

剪燭臨清夜閒窗對白雲不眠詩共賦歌罷酒初醺風起
松聲近溪迥野色分別來愁思滿南雁正紛紛

余自流江將歸南溪劉先生亦還珠林賦此別伯昂
諸友

白紵明春事清尊注晚霞客行天共遠人醉月初斜武岫
神仙宅珠林處士家東歸三十里好爲寄梅花

寄吳所與

南溪流水北溪雲無限新愁總憶君鴻鴈歸時天杳杳鷓
鴒啼處雨紛紛郎官湖口江流合武姥峰頭樹色分相去
只緣三十里此生何事苦離羣

宿平陸村

昔年曾此宿今日是重游兵後人煙少村中草樹稠霧開
螢照夜月霽雁鳴秋明發前途去逢人問鎮州

蕭岐

岐字尚仁泰和人洪武十七年以賢良徵上十便書萬餘言皆指切授潭府左長史固辭謫楚雄儒學教授改平涼學訓導致仕復召與錢宰等考定書傳學者稱正固先生有正固先生集

入閩

自入閩中道偏諸物外情田從山下種船向石稜行海味空多族榕根盡倒生連城公館好驛使遠相迎

五老峰

峩峩五老人乃在匡廬山不知幾幾年俯仰俱蒼顏端居烟霞表下視滄波間翠峰列諸壑秀者如雙鬟嗟余未伏

老愧爾長清閒正面色逾好側見景不慳因看瀑布泉忽
憶東林關相期巢雲松鼓柂當南還

陳希曾

希曾字自省號恕齋奉新人洪武十七年以貢士
舉本縣訓導

越嶺雲旗

越王故壘暮雲飛尙想高秋見畫旂五色縱橫分部曲九
重繚繞度旌旗夕陽無復龍蛇影夜月空餘鳥隼悲懸膽
當年心事苦復讎寧忘會稽時

鄧輝

輝字伯機號樂隱奉新人洪武十七年以明經舉

本縣訓導

九仙溫泉

馮水溫泉在何許九仙山遠縣西徧窮源洗藥出煙霧夾
岸種桃成洞天誰曾射日落水底人想沸潭通石邊亭柳
垂垂謝攀折亂離不比驪山前

易 恒

恒字久成廬陵人徙崑山築泗園詠歌其中洪武
中應薦至京以老罷歸有陶情集

次沈生江村韻

一逕漁樵外孤亭水樹間池春芳草合庭午落花閑僧爲
徵詩至兒因賞酒還卷簾看野色微日下柴關

遊上方小酌僧舍

上方氣壓湖山勝老我登臨思惘然一鳥影沉秋水外千
峰勢斷夕陽前清尊白髮酬今日畫舫朱簾記昔年獨倚
危闌重弔古荒臺樵唱起蒼烟

述懷

雁信無憑蝶夢訛寥寥空望遠人過家如明月圓時少腸
似遊絲斷處多垂白不禁青鏡在落紅其奈綠陰何百年
歲月今如許誰遣流光逐逝波

鹿城隱居

避俗龐公隱鹿門鹿城靜亦絕塵喧釣綠水北菰蒲渚意
俯江南桑柘村書蠹字殘繙汗簡石魚銘古刻窪尊地偏

舟楫稀來往，獨有烟潮到岸痕。

錢塘築城過西湖述懷

人間秋色易蕭條，湖上風光更寂寥。
龍井陰時應有劍，鳳臺空後不聞簫。
修眉愁澹初三月，畫舫歌殘第六橋。
坐看兩峰千古竝，蓬萊幾見海塵漂。

人民城郭是耶非，幾度徘徊有所思。
雷火已焚楊瑾塔，劫灰又見漢家池。
岳王墓下石如馬，伍相祠前雲若旗。
物色山來關氣象，盡拋金甲定何時。

中秋對月

一覽清暉萬里過，百年秋興此時多。
鮫童袂薄遺珠淚，織女機寒濕鳳梭。
崔語不知人，是否烏啼數點夜如何。
江湖

莫動魚龍寂應有淒涼及釣簑

耿耿孤光海上流
幾家空想大刀頭
欲探蟾兔應無迹
始信山河總是愁
白露丹楓寒自化
清霜白骨爛誰收
此身若有雙鳧鳥
不向人間歎九州

冰壺出水淨無波
不著漂漂一葦過
鼓角聲沈知夜寂
梧桐葉盡覺秋多
年侵容鬢煩霜雪
涼到衣裳惜芰荷
只恐桂花零落盡
空留清影自婆婆

曉過黃山書所見

海門日出破江昏
潮入中流砥柱分
白石不消千古亂
鷗忽起半沙雲
香旂紅粟來吳餉
犀甲戈船到水軍
最是黃山風水闊
莫教吹笛惱龍君

睡起

睡起喚茶猶未醒強將物色與詩裁
楊花易遣爲萍去春夢難憑化蝶來
草信無名生自得鷺知有性立還猜
出門一笑忘情景濯足清江坐碧苔

廬州武昌二邸失守由太倉陷海之燕感賦

東南六月多炎暑遠道胡爲太子來
宮旆拂雲何地出樓船人海幾時迴
滄溟渤海魚龍混錦里江山草木哀
田野布衣空有賦莫憑徐市問蓬萊

挽吳孟思

學古名堪曠代齊白頭南國尙悽悽
漆書已負成蝌斗石鼓空傳出寶雞
半夜旅魂山塔靜百年春夢水雲低
湖天

怪雨歸何晚，直待花殘杜宇啼。

晚泊揚子江口述懷

落日雲山外，孤舟野寺陰。招魂悲楚些，歌榜起吳音。風色洲前定，江痕雪後深。頻呼秣陵酒，聊慰白頭吟。

風雨憶瀆西

故園十畝瞰林塘，花竹陰陰覆小堂。好友肯來惟一老，夫不出是尋常。白魚寒鱸槎頭雪，朱橘秋嘗屋角霜。雨風風歸未得空，勞飛夢繞滄浪。

會麟

麟字子貞廬陵人，洪武中以薦授靖安訓導。除周府紀善，以忠直聞號直素先生。聞王被逮引咎自

殺世以賈誼死梁比之後與曾鳳韶竝祀二忠祠

興福寺

閑拖鳩杖故穿雲步入仙都謝世氛鶴返危巢辭碧落龍
歸古洞帶腥雲爐中丹劑何勞試木杪泉聲不厭聞覓得
筠天三弄曲鳳簫吹向玉宸君

謝敬

敬字友端湖口人洪武中應歲貢入太學太祖命
試以時務條陳剴切授四川道御史不避權勢以
剛直稱

詠石鐘山

霜臺曾濫聞韶鼓空雨耳無音樂歸來石鐘復一聽洗

却塵襟逾磊落我欲攜之上九重希聲一振清寥廓

練子寧

子寧名安以字行號松月居士新淦人儋子洪武十八年進士廷對第二授翰林修撰陞副都御史工部侍郎建文時遷御史大夫靖難師入不屈磔死福王時贈太保都御史諡忠貞有金川玉屑集

題黃彥成雲林小隱

有客素肥遯幽居愛林廬結屋依陋巷種樹遶城隅浮雲南山來清陰覆其閭老柳帶寒色芳蘭露春腴窗深不知曉樹密室自虛甘貧意自適守道樂有餘娛賓非肯酒飽食但園蔬流水赴大壑翔禽戀高株物性各有遂誰能常

江西詩徵

卷四十四 明六

三

宴如

水竹居詩

高人結宇修篁裏，軒戶玲瓏映流水。庭臯月轉翠陰生，溪上風回青浪起。翠陰青浪映窗扉，曲徑臺深客到稀。林下移牀揮麈坐，沙頭繫艇釣魚歸。柴門無事臨流敞，高臥支頤聽清響。千山暮雨石泉通，一夜春雷籜龍長。几席清幽俗事疏，波光盡日映圖書。何年得遂辭塵塊，杖策相從此卜居。

玉山謠贈時憲

我所思兮玉山之岵巖，粲芙蓉兮浚丹霄。謫仙一去已千載，至今誰續廬山謠。熊侯家住劔江側，慣掃秋山之黛色。

尚余此興爲寫之彷彿梅仙舊時宅梅仙兮何在邈清風
兮滄海塞夷猶兮孤舟吊遺蹟于千載舟中所載非凡流
美故人兮李與周按玉笙兮明月下黃鵠兮清秋洞天兮
石扇蒼崖兮路轉橫余劍兮視八荒訪蓬萊兮幾清淺張
侯兮昂藏驂白鶴兮青霓裳窺玉梁之寶笈醉石髓之瓊
漿千巖萬轉路莫測酒酣一笑三山窄待得君王賜鑑湖
錦袍重訪山中客

送周望往四川

駟馬橋邊秋水波郎君此去意如何衡陽雁陣驚寒早巫
峽猿啼入夜多一水東來通漢沔衆山西上接岷峨少陵
祠字清溪曲爲瀉瓊漿試一過

解嘲

秋來逸興浩如雲間拂霜華看劍紋莫怪風流謝安石未
應憔悴沈休文驩駟神駿寧論肉雕鶚身輕更出羣千載
征南不穿札至今猶作晉元勳

秋日作

水精簾動桂花風湘簟涼生八月中落魄西窗銀燭底烏
絲雪鬢寄秋鴻

謁余忠宣祠

將軍忠節貫荆襄千載精神日月光血戰孤城身已殞名
垂青史汗猶香殘碑墮泪空秋草折戟沉沙自夕陽我亦
有懷追國士爲來感慨奠椒漿

三月望日與饒隱君子宏遊玉笥山

我懷謝康樂獨往遊名山身同雪舟繫心與浮雲間清風
澹蕩灑六合令我興在雲松間玉山高與南斗齊雲錦照
耀廬山低三十六峯凌虹霓飛湍噴雪臨迴溪長松挂月
青猿啼上有梅仙采藥之幽棲下有蕭雲讀書之故基洞
天石扇杳莫測瑤草謾長三春蕙我欲因之覽八荒手拂
青蘿眠石牀回飈吹散碧天霧清冥倒瀉澄湖光作爲玉
山謠寄之雙峰客興來攜妓秋復春笑殺東山謝安石

樵谷歌爲雙峰饒子宏賦

金川南上佳山水翠壁丹崖相對起玉山三十六芙蓉都
入樵翁笑談裏藤蘿縛屋薜荔衣朝往青崖曛暮歸松陰

遺世時高枕谷口行歌日看棋昔年我作金門客素衣半
化緇塵黑當時拄笏望西山始信漁樵不輕得今年奉勅
又朝天手展詩囊索贈篇移文未許山靈請伐木終期友
道全丈夫出處須知命軒冕山林總天定他年我亦謝官
歸遲爾長鑱綠蘿逕

駿馬歌

君不見穆王八駿遊天路跡遍寰區尙無度樂同王母宴
瑤池賴得君牙挽周祚又不見明皇幸蜀八馬龍天寶不
及開元中漁陽鼙鼓烟塵黑玉環妖血鞍韉紅君看玉蹄
三十二莫是天閑舊驥殘嗚一片雨餘天芳草何年牧
歸地雄姿逸態汗血新風鬃雲初鬣騰踏勻一嘶一齧各有

趣或行或止森同羣奚官控出塵飛動豈是造父王毛仲
麒麟雖在地上行光價合爲天下重摩挲猛氣猶騰驤出
世卽論周與唐吾皇不受千里獻黃金樂施涓人方駿兮
駿兮渥洼種際會風雲擅才勇還君此畫歌我辭閩闔風
生毛髮竦

待月歌

并引

昨夜露坐東山停杯待月俄而桂香西來皓月東
上清興灑然殊有塵外之想遂成短歌一章馳寄

一二同志

天風吹桂香夜久露華結清興誰與同停杯待明月明月
須臾海上來青天一望無塵埃人看明月皎如昨月照人

閒知幾迴人生何用嗟歎絕月本無心尙圓缺玉兔搗藥
能長生不管麻姑鬢如雪月既照我飲我且爲月歌舉杯
勸月月亦喜清樽歷亂揚金波願把紫鸞笙雙吹向寥廓
直上蓬萊第一峯坐聽霓裳奏仙藥

贈人

憶昔先人辭玉京君家父子來相迎開軒岸幘眺松雪酒
酣落筆滄溟驚周南畱滯有遺命謫薄濫欲追羣英明當
盡節報天子從此雲間吹玉笙

贈魯生師德東遊

羨子多才藝臨風感慨深琴彈別鶴操聲作老龍吟落落
平生志悠悠太古心東遊萬里道到處遇知音

周子林讀書樓

藏書貽矩誨僻地起高樓
月露連書蓄星河拂戶流
蘭膏長照夜竹簟正宜秋
窻迴伊吾遠簷高絡緯愁
分陰思積學暇日坐消憂
芸閣歸來日相期共校讎

廷試作

天子臨軒策治安近臣如雨侍金鑾
百年禮樂成周典一代威儀陋漢官
文氣夜連奎璧動龍光晴射斗牛寒
董生莫負天人策學術須期百世看

讀書臺

聞抱瑤琴訪百花上人還與論三車
能分香積厨中飯慣煮孤山雨後茶
洗墨池荒秋草合讀書臺古夕陽斜
壁間

正好題詩句，留取他年護絳紗。

小姑山

姑石嵯峨不可攀，粧臺更在白雲間。
丹梯下壓龍蛇窟，鐵鎖高懸虎豹關。
使客未鳴蒼玉珮，江妃先擘綠雲鬟。
江南莫道無形勢，竚立天門第一班。

送人之官

雨霽清流玉滿川，錦衣簇簇立沙邊。
旋沽南石橋頭酒，卹送東風江上船。
行色一枝春在柳，去程千里水連天。
待看考績歸來日，細聽鶯聲奏管絃。

次孟子溫贈什

銀箭銅壺促曙暉，暉暉論文未覺故人稀。
連牀風雨三年別，百

里山河兩地逢人物數推黃叔度文章誰似謝元暉高臥
莫道無鳴鳳舊種梧桐已十圍

寄曾得之

諱魯館陶人
禮部侍郎

高鳥知還久倦飛分甘萬里遠王畿虎頭食肉侯何用雞
舌含香事已違博望尋源經月去長卿違蜀暫時歸寄言
玉筍雲中客終擬相從採蕨薇

送總戎出征

天子龍飛定朔南知君此去定呼韓班超自信輕投筆馬
援仍能老據鞍飲馬窟春泉脈煖射鵬風急雪花寒同行
王粲吾知已應有音書早寄看

罷直圖

草詔下金鑾宮槐白露寒紫騮驕不控明月在闌干

山水小景

玉筍諸峰翠接天鶴汀鳧渚近相連老翁日暮不歸去釣
得槎頭縮項鱸

達泉圖

一夜春雷動石泉桃花新漲已連天幽人悟得朝宗理興
在滔滔百折前

中秋日答曾仲和

桂花涼露瀉涓涓秋滿銀盤月正圓不是庾公無此興祇
因病酒妬婵娟

題范菴所藏畫

鶴羽修脩弄月明
篔簹谷裏暮寒生
憑誰截作參差玉
吹出伶倫嶰谷聲

賦得孟義科斗送監生楊仲文歸台州親迎

孤石巉巖出紫烟
雲根遺墨尙依然
文章豈在龜疇下
形質還存鳥跡前
汲冢秋風思汗簡
魯堂春雨閱韋編
郎君歸去和鳴後
織作機中錦字傳

己丑三月訪子白兄於秦淮橋

五月南風水倒流
秦淮橋下問扁舟
穿花燕子羽毛濕
隔水人家門巷幽
心憶庭闈瞻楚樹
身陪冠冕侍瀛洲
吾兄歸去如相問
衣采終期慰白頭

送周澄之歷城

難兄佐邑持風采令弟辭家篤友于風雨幾年疎共被關
河千里轉征車天垂鉅野河流急秋盡江南木葉疎他日
到官煩問訊琴堂詩思夜何如

黃子澄

子澄名湜以字行更字伯淵分宜人洪武十八年
進士廷對第三累官太常寺卿建文初兼翰林學
士與齊泰謀削諸王靖難師起密募兵於外後被
執抗辯不屈磔死福王時贈禮部尚書諡節愍

聞李景隆敗績紀事

仗鉞曾登大將壇貂裘遠賜朔方寒出師無律真兒戲負
國全身獨汝安論將每時悲趙括攘夷何日見齊桓尚方

有劍詎誰借哭向蒼天幾墮冠

枯梅

百千年樹未全枯三五個花何太疎聞道石門春意動不知曾有暗香無

題梅竹贈一軒上京

老幹鐵爲骨疎枝玉作花至今明月裏清影落牕紗

賞芍藥

清門公子惜芳春開筵上日延嘉賓當堦芍藥綻紅白冰姿艷質俱天真昭君已入丹青手何郎未醉黃封酒丹幄籠霞麗日長玉盤承露新粧久廣陵異種古來誇獨有金帶稱奇葩廟廊大材今復見玉堂學士歐陽家尙憶西園

全盛日碧海蓬瀛繞丹室江南一夜劫灰飛奇花異卉誰
能識後來繼述有雲仍况君伯仲兼才名千金不惜買歌
笑栽花種竹長留情厭聽鶉鴉聲春漸老把酒看花花正好
祇恐春光不肯留人生行樂應須早酒酣公子還高歌相
逢不飲將如何何妨共醉金叵羅一笑塵世空奔波

爲一軒題墨菊

急雨過幽徑黃花滿地秋江南那有此風景在黃州
晚節已驚世清香更可人儘他霜露重朶朶自回春

次歐陽元春先生牡丹韻

吾聞開元盛時花富貴世稱黃姚與紫魏買栽池館占東
風舞袖歌喉織體醉煖籠輕態嬌無塵瑤臺月下真天人

長衢繡輓車鄰鄰黃金買斷京華春
唵魂誤寫陽臺雨玉環怒捲霓裳舞
青螺蜀棧歛然西千載沉香有禾黍
吁嗟世事知幾遷羲輪日夜行翩翩
滁山尙培魏家紫至今國色猶依然
花中富貴衆所喜近代名花能有幾
要知種德如種花方遣子孫看到此
幾回歌罷招飛仙仙子問我今何年
少年意氣爲傾倒醉倒猶向花神前
人生百年世稀有但願東君與花各
長壽年年歲歲兩相歡好見此花大
如斗

酬姚六丈

海內瘡痍盡同心尙幾人
冬雷鱗瓦震邊報羽書屯
日夜思良將烟雲困旅臣
中宵燈下草無路達楓宸

君恩無可報惟有淚沾衣敢託江湖遠難忘獻納非共知
師失律何忍遜爲肥日望長安信暮還空掩扉

還洞庭

此身已托網常寄雖有乾坤奈爾何富貴幾年輕桎梏文
章千古重山河君恩寶玉空懷在世事風雷展眼過莫謂
海鄉非故國子孫應保碧山阿

九重行

九重赫斯怒詔平灤河源虎賁六十萬龍驤蔽幽藩一朝
失節制空使廟堂寃無論感激士是非日夜喧孤臣謫水
國携稚學灌園聖明本無意執政法紀存料死不料敵銜
怨不銜恩何能長安道犯顏回至尊有夢不得通晨起沐

朝暉飛魂逐楚岫揮淚灑吳門

送劉醫士歌

世人欲學醫國手今人不見古人有古人已遠可奈何力
追猶落軒岐後四時錯運六氣滯窮簷蔀屋多呻吟眼前
盡是學醫者到頭蘇息誰關心宜春劉君故鄉客京國相
逢舊相識囊中贖貯活人方住市懸壺不盈尺夜來疏雨
敲梧桐爲言歸思生秋風侵晨過我揖我別行李便逐南
飛鴻嗚呼上醫不可見搔首乾坤淚如霰還家種杏早成
林宋清當有河東傳

歐陽貞

貞字元春分宜人揭後斯門人工古文精易學洪

江西詩徵

卷四十四

明六

三

武初鄉舉授考城主簿以老歸後登十八年進士
有龍江叢稿餘學初集貧樂集

贈梅耀

有美人兮冰雪姿稜嶒詩骨兩相宜與梅共結歲寒友瘦
比孤山第一枝

題贈一軒

十載追隨鴛鴦班九重宮闕拜龍顏歸來却似香山老吟
弄寒流八節灘

魏卓

卓字與立號五湖廣昌人洪武十八年進士官御
史巡察河南有內戚恣橫置之法詣闕陳狀太祖

賜酒曰御酒同卿飲鋒刀不肯饒意其乞哀卓應
聲曰寧爲忠諫死何慮聖心焦忤旨被戮已而悔
之賜葬復官

昭忠廟

當代扶危日忠臣烈士心嬰城功不淺殺妾恨猶深氣宇
衡山嶽英名亘古今男兒有爲者效此作師箴

陳立

立字叔本南豐人洪武十八年進士官宜陵縣丞
紫霄觀

平生欲訪元都境如躡丹霞萬丈梯一水縈環分遠近衆
峯羅列競高低仙翁得道曾遺蛻羽客尋真信有蹊眼力

豈能空四海諸州一望九垓齊

況思文

思文字原道奉新人有詩名洪武十八年以明經授本邑訓導

靈境御題

題詩誰向雄峯表帝子遐踪與世違雲漢天章垂藻翰蓬萊仙響落巖扉掌中已覺山河小宇內空看歷數歸白髮殘僧懷古悵斷碑零落幾斜暉

吳節性

節性峽江人洪武二十年鄉舉官國子助教以清謹著太祖手製勅嘉之旋致仕歸

雲儲洞

雲儲畫永白雲閒一曲清溪環兩山葉落烏啼誰是主惟
容長嘯絕塵闌

解縉

縉字大紳吉水人洪武二十一年進士授中書庶
吉士改御史永樂初擢侍讀與黃淮楊士奇等七
人竝直文淵閣進翰林學士出爲廣西叅議以定
建儲議爲高煦所譖謫死有春雨堂集

遊永興寺

斷碣龍蛇不記年蒼松老幹欲參天扣門野衲頻相識笑
語西來一字禪

題文文山已巳詩後

崖山雲寒海舟覆六載孤臣老燕獄東風杜宇三月三五
陵望斷春蕪綠墨花皇皇五十六寫出江南愁萬斛當時
下筆眼如虎日落天低鬼神哭揚帆昔走儀真船手持鼈
柱擎南天間關嶺海血灑檝回首家國隨飛煙六宮粉黛
黃埃裏漢火無光吹不起全軀肯學褚淵生嚼舌甘爲杲
卿死薊門草碧春淒淒高官不採西山薇哀吟一曲肝腸
裂勁氣萬丈蛟龍飛當年恨殺葛嶺賊恨不剗心食肉血
堂堂忠義行宇宙白日青天照遺墨落花寒食風雨時展
卷如對龍虎姿再拜酌公金屈卮有酒不讀蘭亭詩

廬陵城西玉虛觀

廬陵城西有黃壇五岳秀拔當天關黃君昔年此煉丹瑞
霧倏燦霞采殷龍光騰騰霄漢間井水玉液溫可餐丹成
白日遊區寰陟降珮玉聲珊珊餘光下燭疑可攀星冠雲
葉振鸞班棟宇金碧垂雲爛祝釐祈祥夸險艱福慶大來
若河山稽首上帝不違顏五風十雨如循環

早發文江

北風吹冷薄寒裘萬里遙憐上國遊雪色迷人明遠岸江
聲入夜到孤舟春歸忽聽雲霄鴈晝臥惟聞渚水鷗不爲
浮名相繫絆故園花木興悠悠

遊東華觀

山踞東華虎勢雄俯看城郭笑談中樓臺影倒一江月松

檜聲傳萬壑風賓館茶煙凝座紫仙房丹火隔窗紅素疑
弱水迴蓬島今日方知有路通

賦得字水成文送子魯

章江飛出顛石來大舉渡頭羣玉開神螺浦翠曉光發天
玉山高青練回東江西江小水合章江中流何壯哉雙洲
橫作兩龍劍交鎖石瀨鳴春雷一點分明飛作筆上字成
文下成吉滄田桑海說荒唐焉得河圖洛書出文水生祥
不可休坐談孔孟思伊周蕭曹管樂不足數倦遊往往思
扁舟陳君更在水西住幾回擊楫歌中流鷓鴣洞前薜荔
曉赤石潭下芙蓉秋天風吹雲捲大旗玉文深發清漣漪
君今歸去事仙賞我亦懷之歌式微

題泰和普覺寺壁上畫水

曾生畫水真是水乍見卽有風雲隨神閑意靜看漸遠以
手摩拂生驚疑曾生泰和人表字字同可浙江橋頭坐幾
年彭蠡浪花分朶朶歸來却掃青屏壁寶藏四圍驚霹靂
蒼茫霧雨散不收白龍捲水當夏日始知曾生古來少突
兀天生此奇筆又聞寶藏聲鄰鄰一夜不眠雞向晨并刀
欲剪且未翦怕有仲尼來問津

東湖覽勝

十年不到豫章城鎖蛟宮中新水生澹臺祠下日乍午觸
熱更上聘君亭聘君亭前無亂蛙此事或有非人誇聘君
高風自千載况有湖水明丹霞望中西山青似幕叅差開

微芙蓉花登高覽勝興未已柳風吹天姿似洗青眼故人
殊已稀慷慨更讀南豐碑

吉水清潭集虛觀詩

洞天郁木仙所都避秦亦有驪山徒九仙同日上龍湖世
傳此事應模糊漢皇求仙溫詔敷築壇除道通屬車玉笥
天降仙冠裾環山百里草木孚清潭上有丹鼎爐危仙陟
降來此國有唐中葉誰所廬太寧高君起集虛白沙翠竹
相縈紆瓊林瑤樹枝扶疎文節大書照金鋪鸞停鶴峙霞
采俱塑像儼若天神趨觀者起敬生怡愉祈靈集禧災害
除上應列宿斗牛躔萬歲永奠東南隅

題吳山伍子胥廟

朝驅下越坂夕飯當吳門停車吊古跡靄靄林烟昏青山
海上來勢若游龍奔星臨斗牛域氣與東南吞九折排怒
濤壯哉天地根落日見海色長風捲浮雲山椒載遺祠興
廢今猶存香殘吊木客樹古啼清猿我來久沈抱重此英
烈魂吁嗟屬鏃鋒置爾國士冤鞅鞅姑蘇臺荆棘曉露繁
深宮麋鹿遊此事誰能論因之毛髮豎落葉秋紛紛

挽筠澗先生

逐鹿兵還郊鼎移故家風節似君稀山河百二還真主泉
石東南隱少微黃菊花時高士醉青門瓜熟故侯歸九原
若遇余幽國猶話孤城未解圍

送劉繡衣按交趾

江表言律 卷四 四
三
虬髯白鳥繡衣郎
驄馬南巡古越裳
城郭新開秦郡縣
山河元是漢金湯
天連銅柱蠻烟黑
地接朱崖海氣黃
莫說炎荒冰雪少
須令六月見飛霜

龍州

波羅蜜樹滿城闌
銅鼓聲喧晝賽神
黃帽葛衣墟市客
青裙錦帶冶游人

怨歌行

絃奏鈞天素娥之寶瑟
酒斟流霞碧海之瑤杯
宿君七寶流蘇之錦帳
坐我九成白玉之仙臺
臺高帳煖春寒薄
金縷輕身掌中托
結成比翼天上期
不羨連枝世間樂
歲歲年年樂未涯
鴉黃粉白澹相宜
卷衣羞比秦王女
抱衾誰

賦宵征詩參差雙鳳裁筠管不謂年華有凋換楚園未泣
章華魚漢宮忍聽長門雁長門蕭條秋影稀粉屏珠級流
蠶飛苔生舞席塵蒙鏡空傍閑堦尋履綦宛宛青陽日將
暮惆悵君恩棄中路妾心如月君不知斜倚雲和雙淚垂

答胡光大

去年雪中寄我辭一讀一回心轉悲結交誰似金蘭契舉
世紛紛桃李姿我觀百歲須臾爾人在乾坤猶釀器清醲
糟粕總成空四海滔滔豈知醉我似浮雲與世乖醉醒自
是難相諧天地悠悠尙應盡百年草草爲形骸吟詩作賦
愁肝腎絕穎屠羊爭筆陣勞筋苦骨竟何爲一榻清風萬
年盡襄陽太守何其愚沉碑水底誇龍魚至今人笑陵谷

改亡吳帝晉今何如我有窮愁何日寬醯雞起滅閑獨看
痴兒細子能萋斐毀譽榮辱吾何干今年春到花應早預
擬南園踏芳草細看春色天上來萬樹芳花照晴昊莊生
久矣喜逍遙陶令何曾恨枯槁吸醕盡醉也徒然一笑千
金永相保

戲筆賣魚歌爲陳檢討題

長廊翠壁春風香千絲綠玉垂青楊沉沉雨濕鴛鴦瓦飛
絮無聲吹嫩涼百戰健兒花刺身雕龍纈錦青作鱗蛇子
鎖甲蛛網結甘作中年無事人髣髴未受霜華染回首前
年如過險厭說亂離欣太平短短衣裳耐不掩織成籜竹
黃琉璃兩筥添檐鉛粉朱椎油熟紙細熨貼追逐兒童行

賣魚小魚濺刺金稜椀圍圍紅黃雲滿滿坐杵兒戲未論
錢斜陽欲落籬根淺一見欺之掩其目故故痴痴屢回囑
兩兒擎榼窺其魚竊得款奔躡而哭後來二女褰繡簾扶
出細兒求乞添坐闌少婦意尤羨如此九子皆織妍畫工
盡得無窮意紛紛百事皆如戲造化徒勞作弄兒祇許買
魚翁自知

中秋不見月

吾聞廣寒八萬三千修月斧暗處生明缺處補不知七寶
何以修合成孤光洞徹乾坤萬萬古三秋正中夜當午佳
期不擬姮娥悞酒杯狼籍燭無輝天上人間隔風雨玉女
莫乘鸞仙人休伐樹天柱不可登虹橋在何處帝闈悠悠

叫無路吾欲斬蝮蛙磔冥兔坐令天宇絕纖塵世上青霄
祭如故黃金爲節玉爲輅縹緲鸞車爛無數水晶簾外河
漢橫冰壺影裏笙歌度雲旗盡下飛元武青鳥銜書報王
母但期歲歲奉宸遊來看霓裳羽衣舞

蒼梧卽事

蒼梧城北繫龍洲水接南天日夕流水并鱷池春草合火
山蛟室夜光浮千家竹屋臨沙觜萬斛江船下石頭伏枕
夢回霄漢遠珮聲猶在鳳凰樓

梧州舊治扶桑國虎圈山名記大園罨戶舉罨看水影舟
人移厥認潮痕貧婆菜熟紅包坼荔子花開綠萼繁北望
九疑雲蓋外重華端拱太微垣

桂嶺東來下惡灘，蒼梧細柳綵雲間。
拍天二水通交廣，從日高城跨北山。
茆屋竹牌依古瀨，筒槽漁艇滿江灣。
驛亭笳鼓中宵發，又報南天使節還。

回朝卽事

赤闌紅映夕陽齊，蹀躞天麒度不嘶。
近侍報來應鎖閣，垂輿又過御橋西。

早朝

驄馬五更寒，披衣上繡鞍。
東華天未曉，明月滿闌干。

赴廣西別甥彭雲路

多情爲我謝彭郎，采石江深似渭陽。
相聚六年如夢過，不如昨夜一更長。

過全州

陶生巖畔草青青
唐介墳前江水聲
兩岸鷓鴣啼不盡
畫船撾鼓過全城

彭澤

青山圍一縣
隱見人家亂石邊
江出孤帆帶日斜
翠漆官舍柳香泛
驛樓花不見
陶彭澤
湓城起暮鴉

寄黃元齋

來時蕭峽駐輕舟
惆悵初年作遠遊
夢裏相思不相見
武功山下月輪秋

承天宮

玉笥承天老子宮
平原十里萬山中
三千歲後桃花老

十四橋流水通梅子廟荒秦樹倒何君石在古苔封同遊
感慨知多少雲物淒涼夕霧重

山如籠養冲天鳳下見承天屋數楹南極有峰爲玉筍西
都無地起金莖水流不盡蕭雲墨仙籙空存漢武名合著
萬金修史館御香幾度降青冥

至西江訪孔宅

卿家難弟復難兄詩禮相傳厯過庭雲接西江承教雨天
闕東壁見文星八州事業空塵土三孔衣冠尙典型沐浴
清光今寂寞願從洙泗學遺經

謁周瑜廟

巴邱古縣周郎廟從祀甘黃共儼然三國已興吳社稷二

喬猶泣漢嬋娟漳河碧草迷宮沼皖水青林遶墓田蓋世
英雄非幸會東風赤壁尚年年

聶任

任初名思敬南城人子述齋孫洪武二十一年進
士治春秋長於吟咏以文學鳴世尤務爲淳樸之
行官本學教諭導誘有方多士德之

麻姑山

仙人家住白雲邊迢遞峯巒上接天琪樹籠煙迷古洞石
橋分水落平川穹碑鐫刻真卿字汗簡流傳子固篇不識
麻姑何處去清風明月滿芝田

江西詩徵卷四十四